

Келеджегимизге первасыз къалмайыкъ!

Къырымтатарларнынъ сюрдюнлик фаджиясы халкънынъ тарих китабында къара саифе олып къаладжакътыр. Миллетимизнинъ бир чокъ къараманларынынъ эляк олмасына себеп олгъан о кедерли ве фаджиялы вакъианы биз, яшлар, унутмаймыз ве ич бир вакъыт унутмайджакъмыз. Амма сюрдюнлик фаджиясыны тек унутмамакъ дегиль де, о вакъиадан дере алмакъ керекмиз.

Украина девлетининъ мустакъбиллиги илян этильген сонъ, халкъымыз ичюн ана топрагына къайтмакъ бираз къолайлашты. Ватангъа къайтмакънен биз тарихымызнынъ янъы саифесини ачтыкъ, чюнки къырым мусульманлары ичюн янъы бир девир башланды. Янъы несилемиз оськен сайын джемиеттеки бир чокъ проблемаларнен расткелише. Бир тарафтан къумарджылыкъ (наркомания), ичкиджиллик, тербиесизлик, башкъа тарафтан «хизб ат-тахрир», «ваххабизм», «джамаа исламия» киби радикаль ве экстремист фыркълар миллетимизни больмеге чалышалар, халкъ арасында фитне-фесат чыкъаралар. Бу фыркъларнынъ азалары, Сейд Къутуб ве Маудудийнинъ эсерлерини къулланып, халкъымызнынъ арасында динимизге уймагъан идеологияларны даркъатмагъа тырышалар.

Халкъымызнынъ озгюнлигини, онынъ медениетини, эждатларымызнынъ диний талиматыны сакъламакъ ичюн идеоложик меселелерни чезмек лязимдир. Бу иште биз къырымтатар лидерлерине, халкъ векиллерине ишбирлик теклифинен мураджаат этемиз. Бу ёнелиште нелер япмакъ керек? Юкъарыда ады кечкен фыркъларнынъ азалары мусульманлар адындан, ислам дини адындан я да инсанларнынъ миллий дуйгъуларына токъунып, динимизге келишмеген шейлерни халкъымыз арасында даркъаталар. Миллетимиз ичинде тюрлю экстремист фыркълар ве акъымларгъа къаршы иш алып барып, оларнынъ халкъ ичинде яйылмасына ёл бермемек керек. Онынъ ичюн энъ-эвеля халкъымызгъа дин ве догъру инанч акъкъында бильги бермек ве шу экстремист гъаелерининъ телюкесини анълатмакъ керекмиз.

Бундан гъайры мусульман эждатларымызнынъ диний китаплары ве эльязмаларына мураджаат этмелимиз. Чюнки дин боюнджа яшап, оны сакълагъан ве кунюмизге еткизген бизим эждатларымыз, къартбаба ве къартаналарымыз олды. Бозгъун фыркълар мусульманлар арасына кирмеге истеген вакъытта бизим эждатларымыз лякъайд, первасыз олмадылар. Олар эр даим Ислам динимизге келишмеген акъымларнынъ фикирлерине къаршылыкъ косьтердилер. Биз оларнынъ уютлерини, оларнынъ васиетлерини ерине кетирип, инанчымызны сакъламакъ ве келеджек несильге огретмек керекмиз.

Биз «хизб ат-тахрир», «ваххабизм», «джамаа исламия» адынен белли олгъан акъымларгъа къаршы бутюн мусульманлар ичюн екъане бир позицияны тутмалымыз. Чеченистан, Афгъанистан киби къызгъын ерлерде экстремист акъымларнынъ яйылмасы насыл нетиджеге кетиргенини корип, биз ана ватанымызда бу акъымларнынъ фаалиетине ёл бермемек керекмиз.

Динимизни огренгенде, экстремист акъымлар акъкъында бильги алып, оларнынъ керчек юзюни огренемиз. Бунен берабер оларгъа къаршы чыкъмасакъ, сусып первасыз бакъсакъ, кет-кете ярымадамызда экстремизмнинъ яйылмасына ёл ачаджакъмыз. Сонъра ким джевапкъяр оладжакъ? Эльбетте, ким мусульман халкъымызны къорчаламакъ вазифесини озюне юклеген олса - о джевап береджек!

Къырым мусульманлары! Халкъымызнынъ дегерлиги олгъан - динимизни, урф-адетлеримизни ёкъ этмеге бермейик! Джемиетнинъ стабиллиги ве инкишафы ичюн чешит медениет менсюплери ве янъы акимет векиллери иле диалог шекилинде иш алып барайыкъ!

Диний экстремизм ве зарарлы фанатизмге къаршы чыкъып, эждатларымыздан къалгъан Ислам дини ве урф-адетлеримиз эсасында бирлешейик!

Халкъымызны чешит провокациялар ичюн къуланмагъа имкъан бермейик!

Къырымтатар яшлар бирлешмеси